

आकाशवाणी

- केंद्री मंत्रिमंडल नै 8में वेतन आयोग दे कार्यक्षेत्र गी मंजूरी देई दिती ऐ।
- राष्ट्रपति द्रोपदी मुर्मू होरें नमीं दिल्ली च इंटरनेशनल सोलर एलायंस-अंतरराष्ट्री सौर्य गठबंधन दे 8में सत्र दा शुभारम्भ कीता। मौसम बदलाव गी थम्मने आस्तै जरूरी गैई पुट्टने दी जरूरता पर जोर पाया।
- चक्रवाती तूफान मोंथा करी आंध्र प्रदेश दे कंडे तोड़ी मौह्लेधार बरखा, हाड ते तेज अंधी झक्खड पुज्जेआ।
- बिहार विधानसभा चुनाएं गी लेइयै चुनांऽ प्रचार तेज, महागठबंधन अज्ज संज्ञा घोशणा पत्र जारी करोग, एनडीए घटक दल मतदाताएं दी रिझाने च लग्गे।
- संयुक्त राष्ट्र च सरकारी कम्मकाज ठप रौहने करी ज्हारें डोआरिं च चिर ते तकरीबन 100 डोआरियां रद्द।
- महिलाएं दे इक दिवसीय अंतरराष्ट्री बल्लेबाजी रैंकिंग च 828 अंके कन्नै भारत दी स्मृति मंधाना पैहली थाहर पर।

<><><><><><>

Cabinet Decision

केंद्री मंत्रिमंडल नै 8में केंद्री तनखाह आयोग जानी पे-कमीशन दे कार्यक्षेत्र गी मंजूरी देई दिती ऐ जेहडा अपने गठन दी तरीक कोला लेइयै 18एं म्हीने दे अंदर-अंदर अपनी सफारशां पेश करग। अज्ज नमीं दिल्ली च लग्गी दी मंत्रिमंडल दी बैठकादे बाद मीडिया गी जानकारी दिंदे होई सूचना ते प्रसारण मंत्री अश्विनी वैशणव होरें एहू जानकारी दिती। पे कमिशन दिएं सिफारशें दी विनाह पर गै तैह होग जे केंद्र सरकार दे मलाजमें दिएं तनखाई ते पेंशनें च किन्ना बाद्दा कीता जाह्ग। वैशणव होरें आखेआ जे काबिना नै हाडी फसलें-2025 आस्तै 37 ज्हार 952 करोड रपे दी सब्सिडी गी मंजूरी देई दिती ऐ ते नमें मुल्ल 1 अक्तूबर थमां लागू होडन। उनें जोडेआ जे इस पहल कन्नै करसानें गी वाजिब भाएं पर खाद उपलब्ध होग।

<><><><><><>

Prez. ISA

राष्ट्रपति द्रोपदी मुर्मू होरें मौसम बदलाव जनेई चुनौती कन्नै निब्वडने आसतै मजबूत ते तुरत गैईयां पुट्टने दी जरूरतै पर जोर पाया ऐ जेडा गै पूरे विश्व पर माडा असर पा'रदा ऐ। नमीं दिल्ली च इंटरनेशनल सोलर एलायंस दे 8में सत्र गी संबोधित करदे होई राष्ट्रपति होरें मौसम बदलाव गी रोकने दी भारत दी प्रतिबद्धता दोहराई ते दस्सेआ जे भारत इस बक्खी मजबूत गैईऽ पुट्टयां रदे ना। उनें जिक्र कीता जे भारत च ते पूरी दुनिया दी सभ्यताएं च सूरज गी जिंदगी ते उर्जा दा इक्कला स्रोत मन्नेआ गेआ ऐ। इंटरनेशनल सोलर एलायंस दी वैश्विक स्तर पर कारगर कोशिशें दी प्रशंसा करदे होई राष्ट्रपति होरें आखेआ जे अगला कदल गूढा समावेश, होना चाइदा जेदे तैहत कोई महिला, करसान

ग्रां या निक्का टापू इस सौर क्रांति च खुंजना नेई चाइदा। राश्ट्रपति होरें सदस्यें गी अपील कीती ऐ जे इक संयुक्त कार्य योजना तैयार कीती जा जेदे हेठ शौर्य उर्जा गी नौकरिएं, महिला नेतृत्व, ग्रामीण आजीविका ते डिजिटल समावेश कन्नै जाड़ेआ जा।

<><><><><><>

## Joshi

केंद्री मंत्री प्रहलाद जोशी होरें आखेआ ऐ जे सौर उर्जा उत्पादन च भारत वैश्विक स्तर पर त्री थाहर पर ऐ। नमीं दिल्ली च इंटरनेशनल सोलर एलायंस असेंबली संबोधित करदे होई मंत्री होरें आखेआ जे भारत नै जीवाशम ईंधन दा आयात घटाई दित्ता ऐ जिस करी प्रदूषण घट्ट होआ ऐ ते साफ उर्जा दे आर्थिक लाह सामने आए ना।

<><><><><><>

## India-Belarus

भारत ते बेलारूस नै हाल च गै मिन्स्क च 8में दौर दी उच्ची सतह दी बैठक कीती। एहदे च भारती प्रतिनिधिमंडल दी अगुवाई विदेश मंत्रालय दे सचिव सिबीजार्ज होरें कीती। इस गल्लबात दा मुख उद्देश्य दौनें देशें दे सरबंधें दी व्यापक समीक्षा करना हा। एहदे च सियासी ते आर्थिक सरबंधें कोला लेइयै सांस्कृतिक आदान-प्रदान, सैलसफा ते शिक्षा सरबंधी विषे शामिल रेह जिंदे पर दौनें पक्खें बशकार तफसीली विचार बटांदरा होआ। भारती धड़ें दा मुख ध्यान बेलारूस कन्नै बपार ते विनिर्माण सहयोग गी प्रमुखता कन्नै बढ़ावा देना हा। इस गल्लबात च ब्रिक्स, शंघाई सहयोग संगठन ते यूरेशियन आर्थिक संघ जनेए प्रमुख अंतरराश्ट्री समूहें कन्नै किट्टै मिलिए कम्म करने दे तौर-तरीकें पर बी चर्चा कीती गेई।

<><><><><><>

## GST-Pujnab

अगली पीढी दे जीएसटी सुधारें कन्नै सरकार नै पंजाब दी अर्थ बवस्था गी खासा मजबूत कीता ऐ जिस करी बक्ख-बक्ख खेत्तरें गी खरी राहत थहोई ऐ। नमीं टैक्स बवस्था हेठ, कृषि ते खाने-पीने आहली चीजें जियां दुध, मक्खन, घ्यो, दही, पनीर, यू.एच.टी दुध, निक्के बच्चें दा खाने दा समान, चाकलेट बगैरा पर टैक्स 5 फीसदी रेही गेदा ऐ जेड़ा गै पहले 12 फीसद हा। इस राहत कन्नै पंजाब दे मुख उत्पादें दा उत्पादन बदेआ ऐ जे रोजगार गी मजबूती मिला'रदी ऐ। इसै तरीके दुध कन्नै बनने आहली मिठाइएं पर बी जीएसटी 5 फीसद रेही गेदा ऐ। लौहके मिठाई आहलें गी मती बिक्री करी एहदा लाह थहोआ'रदा ऐ।

<><><><><><>

## Cyclone-Montha

चक्रवात मोंथा लगातार बरखें, तेज अंधी झक्खड़ ते हाड़ कन्नै आंध्र प्रदेश बक्खी बदा'रदा ऐ। इस तूफान नै विक्राल रूप लेई लैता ऐ जेड़ा 90 थमां 100 किलोमीटर प्रति घंटे दी रफतार आहली अंधी झक्खड़ कन्नै 110 किलोमीटर प्रति घंटे स्हाबै अगगे बदा'रदा ऐ। उत्तर-उत्तर पच्छमी बक्खी बधदे होई

मेद ऐ जे काकीनाडा दे कोल माचिलीपटनम ते कलिंगापटनम दे बश्कार एहदा माडा असर दिक्खने गी लब्बी सकदा ऐ। बडुलै थमां गै काकीनाडा, मचिलीपटनम, कृष्णा, पच्छमी गोदावरी, कोनासीमा, बापातला, पराकासम, नैलोर ते रायलासीमा दे किश हिस्सें च भारी बरखा बरा'रदी ऐ। काकीनाडा ते उपाडा बश्कार इक 8 किलोमीटर लम्मी तटीय शिडक गी नुकसान पुज्जा ऐं खतरे दा निशान नंबर 7 काकीनाडा बंदरगाह पर लाई दित्ता गेआ ऐ।

<><><><><><>

### Odisha-Rain

ओडिशा च दक्खन ते तटीय जिलें च बडुलै थमां चक्रवात मोंथा दे प्रभाव कारण बरखा पवारदी ऐ। मुखमंत्रि मोहन चरण मांझी होरें अज्ज भुवनेश्वर च मोंथा दे मद्देनजर तैयारिएं दे आंकलन आस्तै इक उच्ची स्ती दी बैठक दी अध्यक्षता कीती। इस चक्रवाती तूफान थमां जानमाल दे नुकसान गी नेई होने देने आस्तै सरकार हर मुमकिन कोशिश करा'रदी ऐ। 1 ज्हार 871 गर्भवती महिलाएं सने 11 ज्हार लोकें गी सुरक्षित थाहरें पुजाया गेआ ऐ। प्रशासन 8 रेड जोन जिलें पर पूरी तवज्जो देआ रदा ऐ जित्थे तूफान दे मते असर दी मेद ऐ।

<><><><><><>

### Bihar-Election

बिहार विधानसभा चुनांs आस्तै चुनांs प्रचार नै जोर फगडी लैता ऐं मतदान दे पैहले चरण दा आयोजन अगले म्हीने दी 6 तरीक गी कीता गेदा ऐ ते एहदे आस्तै एनडीए ते महागठबंधन दे दुए दल मतदाताएं गी रिझाने आस्ते हर मुमकिन कोशिश करा'रदे ना। आरजेडी नेता, तेजस्वी यादव होरें आखेआ जे महागठबंधन अज्ज चुनावी घोशणा पत्र जारी करने जा'रदा ऐ जेडा गै महागठबंधन दे धेइऐ गी उजागर करोगा। उनें एनडीए दे नजरिए, एजेडे ते मुखमंत्रि दे दावेदार दे नां पर सवाल कीता। दुई बक्खी लोक जनशक्ति पार्टी (रामविलास) दे प्रमुख ते केंद्री मंत्री चिराग पासवान होरें आखेआ ऐ जे एनडीए गी यकीन ऐ जे जिसलै ओहू वजूद च आई ते अपनी क्षमता दे आधार पर हर इक गी अगगे औने दा मौका मिलोगा। उनें आरजेडी पर सिर्फ इक परिवार आस्तै कम्म करने दा आरोप लाया। उनें दस्सेआ जे उंदी सरकार दा मंत्र साफ ऐ जे सबका साथ, सबका विकास, सबका विश्वास ते सबका प्रयास। जनता दल (यूनाइटेड) नै प्रवक्ता राजीव रंजन होरें महागठबंधन पर झूठे वादे करने दा आरोप लाया ते आखेआ जे मुखमंत्रि नितिश कुमार हुंदे कम्म ते प्रशासन शब्दे शा मते बोलदे ना।

<><><><><><>

### Niti-Aayog

नीति आयोग नै अज्ज नमीं दिल्ली च भारत दे सेवा क्षेत्र पर 2 रिपोर्टां जारी कीतिआं। शुरूआती कार्यक्रम गी संबोधित करदे होई नीति आयोग दे मुख कार्यकारी अधिकारी- बी वी.आर सुब्रह्मण्यम होरें आखेआ जे सेवा क्षेत्र लम्में चिरें थमां नीति बनाने दे दायरे थमां बाहर रेआ जदके भारत दी अर्थ बवस्था च एहदी मुख भूमि रेई ऐ। दुई रिपोर्ट उप क्षेत्रें च रोजगार, लिंग, शिक्षा ते आजीविका पर आधारित ऐ।

<><><><><><>

## MHA-SDRF

केंद्र सरकार नै नागालैंड गी 2025-26 आहले माली बारे लेई राज्य आपदा राहत कोश च केंद्र दे सहयोग दे रूपै च 20 करोड़ रुपे दी रकम, पेशगी, दुई किशत दे रूपै च देने दी मंजूरी देई दिती ऐ। एह रकम देने गितै मंजूरी गृह मंत्री अमित शाह होरें दिती। जारी इक बयानै च गृह मंत्रालय नै आखेआ ऐ जे कुदरती करोपिं ते होरनें आपदाएं दरान केंद्र सरकार राज्यें दे शाना-बशाना खड़ी ऐ ते उनेंगी हर मुमकन मदद ते सहयोग उपलब्ध करांदी ऐ।

<><><><><><>

## US-Flights

संयुक्त राष्ट्र च सरकारी कम्म दे 27में दिन बी ठप रौहने करी 4 ज्हार डोआरियां चिरें होइयां ते 118 बाद्रू डोआरियां रद्द कीतियां गेइयां। एह देरी वाई अड्डे ते हवाई ट्रैफिक नियंत्रण टावरें पर कर्मचारिं दी कमी कन्नै पेश आई। तकरीबन 13 ज्हार हवाई यातायात नियंत्रण ते 50 ज्हार यातायात सुरक्षा प्रशासनिक अधिकारिं बगैर तनखाह दे कम्म करा रदे न जेदे करी कम्मकाज च दिक्कत आवारदी ऐ।

<><><><><><>

## India-Women Cricket

भारती क्रिकेट स्मृति मंधाना नै महिलाएं दे इक दिवसीय अंतरराष्ट्री मैचें दी रैंकिंग च सभनें शा उच्ची थाहर पक्की कीती ऐ। उनें 828 अंके दी रेटिंग लम्मी ऐ जिस करी ओह दुई थाहर दी खडारन थमां 100 अंक कन्नै अगगे ना। आस्ट्रेलिया दी . होरें आई.सी.सी महिलाएं दे क्रिकेट विश्व कप च मंधाना हुंदे प्रदर्शन दी प्रशंसा कीती ही। इस पारी च स्मृति मंधाना होरें न्यूजीलैंड खिलाफ 109 रन्ज बनाए ते बंगलादेश खिलाफ नाबाद 34 रन्ज बनाए हे। स्मृति मंधाना होरें गी सितंबर 2025 आस्तै आई.सी.सी वूमन्स प्लेयर ऑफ द मंथ दा खितब बी दित्ता गेआ हा।

<><><><><><>

## Joint Visit Octroi

सेना, बीएसएफ, सीआरपीएफ, आईबी ते जम्मू-कश्मीर पुलस दे अफसरें दी इक सांझी टीम नै सुचेतगढ़ सैक्टर च बन्ने दी निगरानी लेई बुनियादी ढांचे ते तकनीक दा जायजा लैने लेई सीमा चौकी दा दौरा लाया। बीएसएफ आस्सेआ 15 थमां 29 अक्तूबर तोड़ी चला'रदे सिविल-मिलिट्री फ्यूजन कैम्पूल दे इक हिस्से दे तौर उप्पर आयोजित इस दौरे दा मकसद सीमा प्रबंधन दे बारै च आपसी तालमेल ते समझ गी बेहतर बनाना ऐ। बीएसएफ दे अधिकारिं प्रतिभागिं गी निगरानी, घुसपैठ रोधी उपाएं ते बन्ने पर अबादी कन्नै जुडे दे मुद्दें बारै जानकारी दिती। इस पैहलकदमी कन्नै देसै दे बन्ने दी राक्खी करने आहली सुरक्षा ते खूफिया अर्जेसियें बश्कार सैह्योग, ते आपसी समझ च बाद्धा होआ ऐ।

<><><><><><>

## Land Property Bill

जम्मू-कश्मीर विधानसभा नै अज्ज सरकारी जिमिं पर बनाए गेदे घरें च रवा करदे लोके गी मिलकियत दा अधिकार देने बारै इक प्राइवेट मिम्बर बिल गी खारज करी दित्ता। पीडीपी दे विधायक

वहीद परां होरें एह बिल सदन च पेश करने लेई रक्खेआ ते एहदे लेई हर ब्यक्ति लेई घर दे अधिकार दा हवाला दित्ता गेदा हा। मुख्मंत्री उमर अब्दुल्ला होरें इस बिल दा एह आखदे होई बरोध कीता जे एहदे नै सरकारी जिमिणं पर कब्जा करने गी बढावा थ्होग ते सार्वजनिक जिमिणं दी हर कीमतै पर राखी ते बचाव कीता जाना लोड्छदा। सरकारै परां होरें'गी बिल वापस परताई लैने लेई आखदे होई गलाया जे सरकारी जिमिणं पर कीते गेदे कब्जे गी कुसै बी सूरतै च जायज करार नेई दित्ता जाई सकदा।

<><><><><><>

### CM-BCCI

केंद्र शासित प्रदेश च क्रिकेट ते होरनें खेड्डें गी बढावा देने बारै गल्ल करने लेई भारती क्रिकेट कंट्रोल बोर्ड बी.सी.सी.आई दे अध्यक्ष मिथुन मन्हास होर अज्ज मुख्मंत्री उमर अब्दुल्ला हुं'दे नै मिले। मलाटी दरान दौनें बश्कार जम्मू-कश्मीर च क्रिकेट गी बढावा देने बारै बक्ख-बक्ख पहलुणं पर सोच-विचार कीता गेआ। मिथुन मन्हास होरें मुख्मंत्री होरें'गी क्रिकेट प्रतिभा दी पंछान करने, ढांचागत सुविधाणं च बाद्दा करने ते नौजवान खडारिणं गी मते-मते मौकें बारै बक्ख-बक्ख कार्यक्रमें, पैहलकदमिणं ते सुझाणं बारै चर्चा कीती। चर्चा दरान प्रतिभाशाली खडारिणं दी पंछान करियै उ'नेंगी सिखलाई लेई बनकदा साजगार माहौल ते सुविधा उपलब्ध कराने पर चेची गल्लबात कीती गेई। मुख्मंत्री होरें बी इस लक्ष्य लेई सरकार दे धेइए गी फ्ही पक्का कीता।

<><><><><><>